

Na osnovu člana 29. stav 1. tačka 2. Zakona o lokalnoj samoupravi („Službene novine Kantona“, broj: 22/00 - Prečišćeni tekst), i člana 70. stav 1.tačka 2. Statuta Općine Vogošća („Službene novine Kantona Sarajevo“, broj: 27/14 – Prečišćeni tekst i 14/15), Općinsko vijeće Vogošća na sjednici održanoj 31.05.2017.godine, donijelo je

**O D L U K U**  
**O USVAJANJU STRATEGIJE RAZVOJA SPORTA**  
**NA PODRUČJU OPĆINE VOGOŠĆA ZA PERIOD 2017. – 2022. GODINA**

**Član 1.**

Usvaja se Strategija razvoja sporta na području Općine Vogošća za period 2017.-2022. godinu

**Član 2.**

Strategija razvoja sporta na području Općine Vogošća za period 2017.-2022. godinu čini sastavni dio ove Odluke.

**Član 3.**

Ova Odluka stupa na snagu osmog dana od dana objavljivanja u „Službenim novinama Kantona Sarajevo“.

Broj:01-02-801/17  
Vogošća, 31.05.2017. godine



**Strategija razvoja sporta na području  
Općine Vogošća za period**

**2017. – 2022. godina**

# SADRŽAJ

1. UVOD.....	3
2. ANALIZA TRENUTNOG STANJA SPORTA U VOGOŠĆI.....	5
- Stanje sportskih klubova.....	5
- Stanje sportske infrastrukture.....	7
- Proklamovani javni interesi lokalne zajednice u oblasti sporta.....	12
3. CILJEVI.....	14
4. PRAVCI RAZVOJA SPORTSKIH KLUBOVA.....	15
5. PROJEKTI RAZVOJA SPORTSKE INFRASTRUKTURE.....	17
6. SARADNJA IZMEĐU INSTITUCIJA UKLJUČENIH U RAZVOJ SPORTA.....	18
7. ZAKLJUČAK.....	20

# 1. UVOD

Sport predstavlja sve vrste aktivnosti kroz neformalno ili organizirano takmičenje, čiji je cilj izražavanje ili poboljšanje tjelesnih i mentalnih performanci svakog pojedinca, formiranju socijalnih odnosa ili postizanju rezultata na takmičenjima različitih nivoa.

Kao takav, sport predstavlja rastući socijalni i ekonomski fenomen koji ima značajnu ulogu razvoju društva u cjelini pa tako i lokalnih zajednica koji su sastavni dio te cjeline. Zato olimpijski ideal o razvoju sporta koji također utječe i na razvoj društvene zajednice tako što promovira mir i razumjevanje nacija, kultura i ljudi između sebe kao i edukacija mladih ljudi kroz aktivno bavljenjem sportom i tjelesnom aktivnošću, lokalnoj zajednici pruža mogućnosti da da svoj doprinos, uzimajući aktivno učešće kroz strukturiranje STRATEGIJE RAZVOJA SPORTA OPĆINE VOGOŠĆA 2017-2022 kao i njenu realizaciju i evaluaciju.

Na taj način će se strateški djelovati na mlade, uzimajući aktivno djelovanje u sportu gdje će moći da razvijaju timski duh, solidarnost, toleranciju, volonterizam i fair play.

Međutim, društvo u cjelini pa tako i lokalne zajednice nisu pošteđene problema koji svakim danom pokazuje negativne strane a koje loše utječu na mlade, a te probleme je najbolje detektirao Međunarodni olimpijski komitet (MOK) na konferenciji održanoj 2006. godine na Kubi, i oni su:

- tjelesna neaktivnost u kombinaciji sa konzumiranjem nikotina, alkohola, narkotika predstavlja hronični faktor za nastanak različitih kardiovaskularnih i respiratornih oboljenja,
- čak 60% od ukupne populacije je neaktivno i na taj način nisu u mogućnosti da koriste efekte aktivnog vježbanja,
- veliki porast djece sa prekomjernom težinom,
- urbanizacija i veliki utjecaj informacionih tehnologija na život mladih koji 80% svog vremena provedu uz prekomjerno gledanje TV, interneta, PC igrice, imaju negativan utjecaj na njihov rast i razvoj, što vodi ka nastanku različitih tjelesnih deformiteta,
- istraživanje u SAD u kojem se analizirao televizijski sadržaj, utvrđeno je da 85% TV sadržaja je nasilnog karaktera, pa tako djeca u uzrastu od 7-8 godina koja su gledala taj program, sa velikom vjerovatnoćom će i sama primjeniti nasilje u 18-19 godini života.

Ovih nekoliko relevantnih primjera veoma jasno ukazuju da sadržaji koji se djeci i mladim nude nisu adekvatni, i da sport tj. tjelesna aktivnost može imati veoma važnu ulogu u borbi protiv različitih društvenih problema.

Svjetska Zdravstvena Organizacija (WHO) predlaže minimum tjelesne aktivnosti od 30 minuta, na dan za odrasle osobe i 60 minuta, za djecu kako bi efekat tog vježbanja bio na visokom nivou.

Da bi STRATEGIJA postigla maksimum efikasnosti, veoma je važno uspostaviti snažnu kooperaciju između Općine Vogošća, zdravstvenih institucija, osnovnih i srednjih škola, sportskih organizacija, uz medijsku podršku, koje će uspješno sprovesti strateške zadatke.

Ovom strategijom nastojaćemo definirati viziju Općine Vogošća kada je razvoj sporta u pitanju, kao i načine realizacije te vizije. Prije svega ćemo nastojati ustanoviti kakvo je trenutno stanje, kakvo želimo da bude i šta učiniti da od postojećeg stignemo do željenog.

**VIZIJA** – Vizija, kada je sport na području općine Vogošća u pitanju, jeste stvaranje lokalne zajednice u kojoj se najmanje 15% stanovništva aktivno bavi sportom, te u kojoj najmanje 25% djece i omladine ima redovnu sportsku aktivnost.

**MISIJA** – Za realizaciju ove vizije potrebno je ostvariti misiju koja se sastoji u obezbjeđivanju infrastrukturnih preduslova za bavljenje sportom, podršku sportskim kolektivima i organizacijama, popularizaciji sporta i uključivanju svih relevantnih činilaca u proces realizacije Strategije sporta za period 2017 – 2022 godina.

## **2. ANALIZA TRENUTNOG STANJA U OBLASTI SPORTA U VOGOŠĆI**

Trenutno stanje u oblasti sporta u Vogošći analizirat ćemo sa nekoliko aspekata:

- Sa aspekta brojnosti i organiziranosti sportskih klubova, brojnosti njihovog članstva, učešća djece i mladih u ukupnom broju članstva, planskog djelovanja i kontrole utroška budžetskih sredstava.
- Sa aspekta stanja sportske infrastrukture analiziraćemo brojnost i stanje sportskih objekata i stepen u kojem po oba ova kriterija odgovaraju potrebama građana i sportskih udruženja. Takođe ćemo razmatrati načine i kriterije korištenja ovih kapaciteta od strane građana i udruženja.
- Sa aspekta programskih dokumenata kojima je Općina Vogošća proklamovala analiziraćemo sadržaj tih dokumenata i u kojoj se mjeri sportska udruženja i institucije zadužene za razvoj sporta pridržavaju tih dokumenata.
- Razmotrićemo i načine na koji se proklamovani javni interes u oblasti sporta ostvaruje u općini Vogošća. Načine na koje se sportska udruženja i institucije nadležne za razvoj sporta upotpunjuju u ovoj oblasti. Takođe ćemo definisati buduće pravce djelovanja.

### **2.1. Stanje u sportskim klubovima u Vogošći**

Općina Vogošća redovno prati stanje u sportskim klubovima na njenom području, razmatra godišnje planove i izvještaje sportskih udruženja, te učestvuje i pomaže u njihovom operativnom radu. Svake godine nadležna služba dostavlja Općinskom vijeću na razmatranje Izvještaj o radu i finansijski izvještaj sportskih udruženja koja se finansiraju iz Budžeta općine Vogošća.

Prema tom izvještaju za 2015. godinu u Vogošći je djelovalo 29 udruženja na sportskoj osnovi (sportski klubovi). Prema podacima sportskih udruženja iz 2015. godine u udruženjima aktivno djeluje i redovno trenira oko 1.550 članova. Od tog broja oko 1.250 pripada kategoriji djece i omladine.

Odluku Općinskog vijeća o javnom interesu Općine Vogošća u oblasti sporta u kojoj je akcentat stavljen na masovnost, većina klubova je ispoštovala i opredjelila se na rad sa mlađim kategorijama.

Općina je obezbijedila materijalno – tehničku i finansijsku pomoć JU “KSC” Vogošća i sportskim organizacijama a sve u cilju što većeg okupljanja mladih oko sportskih objekata.

Pravilnikom o sadržaju i načinu vođenja matične evidencije u sportu na području Kantona Sarajevo ( Službene novine Kantona Sarajevo broj 23/03) propisana je obaveza i način na koji svi sportski klubovi treba da vode matičnu evidenciju. svi sportski klubovi sa područja Općine Vogošća su u toku 2015. godine dostavili matičnu evidenciju Sportskom savezu Kantona Sarajevo. Važećim propisima klubovi se obavezuju da svake godine obnove matičnu evidenciju.

Javni interes Općine Vogošća kada je sport u pitanju jeste razvojni sport, sa akcentom na masovnost. U skladu sa tim uticalo se na klubove da znatno više pažnje poklanjaju masovnosti svojih omladinskih pogona, kao i edukaciji stručnih kadrova koji

rade sa mladima. Edukacija stručnih kadrova je i zakonska obaveza klubova u skladu sa članom 25. Zakona o sportu Kantona Sarajevo koji glasi:

«Stručnim kadrom u smislu ovog zakona, smatraju se lica sa visokom ili višom stručnom spremom, osposobljena na fakultetu, drugoj visokoj ili višoj školi za sport. Stručnim radom u klubovima rukovodi stručni kadar iz stava 1. ovog člana».

Matična evidencija je omogućila uvid u brojno stanje te danas koristimo podatak da je skoro 20% mladih uključeno u sportske aktivnosti kroz sportska udruženja. Znamo li da je dugoročni proklamovani cilj u Kantonu Sarajevo da 20% mladih bude uključeno u sport, sa zadovoljstvom možemo konstatovati da je taj cilj dostignut te da smatramo da se taj procenat u Vogošći, u dogledno vrijeme, može kretati do 25 %.

Novčana podrška sportskim udruženjima je izuzetno značajna i u odnosu na ukupan općinski budžet uopće nije zanemarljiva. Tako su u 2015. godini izdvajanja za sport bila 164.960,45 KM što predstavlja oko 1,98 % ukupnih rashoda Budžeta općine Vogošća za tu godinu. Finansijska sredstva se izdvajaju u skladu sa Pravilnikom o kriterijima za finansiranje javnog interesa općine Vogošća u oblasti sporta. Na osnovu ovog pravilnika svake godine se raspiše Javni poziv za dodjelu budžetskih sredstava na koji apliciraju sportski klubovi. Komisija za dodjelu budžetskih sredstava zajedno sa Službom razmatra pristigle aplikacije i predlaže Općinskom načelniku raspodjelu. Na osnovu ovog prijedloga Općinski načelnik donosi Odluku o raspodjeli finansijskih sredstava sportskim klubovima u toj godini.

Iz prezentiranih podataka može se izvući zaključak kako je sport u Vogošći u stalnom razvoju. Razvoj sporta, zajedničkim naporima, podržavaju Općina Vogošća putem nadležne općinske službe, JU KSC Vogošća i sportski klubovi. Razvoj sporta u Vogošći je rezultat i sistemski riješenog načina finansiranja sportskih klubova, jasno definisanog javnog interesa općine Vogošća u oblasti sporta, stalne kontrole namjenskog trošenja budžetskih sredstava, kao i značajnih budžetskih izdvajanja u sport. Osnovni pravci u kojima se razvija vogošćanski sport su: izgradnja sportske infrastrukture, sve značajnije uključivanje djece i omladine i podrška mlađim selekcijama, te takmičarski rezultati kao posljedica ispravne politike u oblasti sporta.

Takođe, moramo pomenuti izuzetnu saradnju RTV "Vogošća" sa svim sportskim klubovima, koja je redovno izvještavala građane o svim sportskim zbivanjima na području naše Općine.

## **2.2. Stanje sportske infrastrukture**

Osnovi uslov za sprovođenje aktivnosti iz oblasti sporta je postojanje dovoljnog broja sportskih objekata, odnosno kvalitetna sportska infrastruktura. Sportski objekat u tehničko-arhitektonskom smislu podrazumjeva sve prostore i površine otvorenog ili zatvorenog građevinskog oblika, namjenjene sprovođenju različitih aktivnosti: treniranja, takmičenja, rekreativnog vježbanja, zabave (uključujući i prateće aktivnosti, pomoćne prostorije, gledalište i drugo). Sa šireg aspekta posmatrano, sportski objekti su resursi proizvodnje sportskih, rekreativnih, zabavnih programa koji obuhvataju sve prostore, građevine, zalihe i opremu. Sportski objekti mogu da budu projektovani i izgrađeni za posebne namjene kao što su bazeni za plivanje ili projektovani za samostalno usmjerenu ili spontanu aktivnost kao što su parkovi, ili samo prirodni resursi pristupačni većini ljudi. Mogu biti projektovani i izgrađeni kao višenamjenski kompleksi sa

raznovrsnom opremom i instalacijama kao što su sportske dvorane, stadioni, rekreativni centri, školski objekti za tjelesni odgoj.

U cilju sportskog razvitka i stvaranje brenda da je Općina Vogošća „sportska općina“ nije važan samo dovoljan broj sportskih objekata, već i da ti objekti zadovoljavaju propisane uslove i kriterije (dimenzije, bezbjednost, sanitarno-higijenske uslove, ...) kako bi se u njima mogle obavljati sportske aktivnosti. Oni moraju da zadovolje normative i standarde kada su u pitanju veličina i oprema, da stvore uslove za optimalno pružanje usluga korisnicima i na taj način budu stvoreni uslovi za kvalitetan rad i masovno korištenje.

Da bi se realizovali programi u sportu, osnovna pretpostavka je da postoje adekvatni sportski objekti i da je prioritet njihovo optimalno korištenje i održavanje. Sportski objekti predstavljaju značajnu društvenu vrijednost i kao takvi su od posebnog interesa.

Prilikom rješavanja problema sportskih objekata, kao najvažnija činjenica nameće se pitanje: planiranja, evidencije, održavanja, izgradnje, upravljanja i korišćenja.

Planiranje izgradnje sportskih objekata mora da odgovara zahtjevima razvoja sporta, usklađenog sa planovima razvoja i izgradnje šire društvene zajednice. Sportska udruženja bi trebala da podstiču i predlažu izgradnju sportskih objekata i da sugerišu na prioritete. Planovi izgradnje bi trebalo da budu sačinjeni uz konsultacije sa kompetentnim stručnjacima (arhitektama, inženjerima, dizajnerima, ljekarima, sportskim organizacijama i dr). Građevinske planove trebalo bi zasnovati na aktuelnim i budućim potrebama za upražnjavanjem sportskih aktivnosti, uzimajući u obzir trend priraštaja stanovništva, socijalno-ekonomski trend i promjene u socio-kulturnom okruženju.

Jedinstvenom evidencijom sportskih objekata neophodno je doći do podataka o zadovoljenju potreba sporta za objektima, kao i o neophodnosti i svrsishodnosti izgradnje novih prostornih sadržaja. Demografska slika i tradicionalni sportovi u općini i su pokazatelji koji navode kakvi nam sportski objekti trebaju.

Upravljanje, održavanje i korištenje sportskih objekata je veoma važan segment u sportu i to pitanje je neophodno riješiti u najkraćem mogućem roku.

Kategorizacija sportskih objekata je od izuzetnog značaja kad je u pitanju izrada strategije. Prilikom kategorizacije sportskih objekata važno je da se striktno definišu sljedeće kategorije:

- kapitalni objekti od interesa za lokalnu zajednicu,
- kapitalni objekti od interesa za razvoj vrhunskog i kvalitetnog sporta,
- objekti od interesa za razvoj određenog sporta ili grupe sportova,
- objekti od interesa za klubove.

U skladu sa kategorizacijom objekata, došlo bi se do mogućnosti lakšeg rješavanja potreba sportskih organizacija za ispunjenje svojih trenajno-takmičarskih procesa i planova.

S ciljem da se poboljša stanje infrastrukturnih elemenata u sportu, predlažemo sljedeće:

- pripemiti kratkoročne i dugoročne planove ulaganja u sportsku infrastrukturu na osnovu analiza o trenutnom stanju,
- sportske resurse koristiti na funkcionalan i planski način,
- ustrojiti elektronsku bazu podataka o sportskoj infrastrukturi i zadužiti ustanovu sa obavezom vođenja evidencije,
- utvrditi normative i kriterijume za održavanje sportskih objekata,
- formirati centar za sportsku dijagnostiku (barem minimalni), te isti približiti sportskim klubovima, sportistima, roditeljima, djeci ....



U smislu obezbjeđivanja sportske infrastrukture period do 2005. godine, na izvjestan način, predstavlja fazu konsolidacije i sanacije ratom razrušenih objekata. Tu se, prije svega, misli na sanacione zahvate na sportskoj dvorani, teniskim terenima i stadionu koji su dovedeni na nivo da zadovoljavaju uslove za takmičenja reprezentativnih selekcija (što je i realizovano u nekoliko navrata).

Sljedeća faza je bila zasnovana na gradnji novih objekata za sport i rekreaciju. To se u toj fazi razvoja odnosi na gradnju vanjskih sportskih ploha dječijih igrališta, igrališta za odbojku na pijesku i boćarskog igrališta.

Posebno značajan zahvat u infrastrukturu jeste bila izgradnja dvije fiskulturne sale uz OŠ „Zajko Delić“ na Kobiljoj Glavi i OŠ „Porodice ef. Ramić“ u Semizovcu. Time su, ne samo ove škole, nego i cijelo područje koje im gravitira dobili moderne sportske objekte što je već rezultiralo razvojem sporta na tim područjima. Takođe, vrijedi pomenuti i izgradnju ansambla sportskih terena na lokalitetu Bušća u MZ Kobilja Glava.

Tokom 2015. i 2016.godine svi vanjski sportski tereni i dječija igrališta su provjereni sa aspekta sigurnosti i izvršene popravke gdje je bilo neophodno. Tokom 2016.godine izvršena je rekonstrukcija 11 vanjskih sportskih terena, 12 dječijih igrališta i izgradnja 4 nova dječija igrališta.

U narednom periodu prioritet je:

- Izgradnja dječijih igrališta na lokalitetima Rosulje i Hotonj;
- Izgradnja adrenalinskog parka iz tri segmenta za različite vrste rekreativaca na prostoru blizu vrtića „Trešnjica“;
- Sanacija krova Sportske dvorane „Amel Bečković“;
- Postavljanje vještačke trave na nekoliko dječijih igrališta;
- Izgradnja sportske dvorane uz OŠ „Zahid Baručija“;
- Izgradnja vanjskog igrališta uz OŠ „Izet Šabić“;
- Izgradnja vanjskog igrališta uz OŠ „Zajko Delić“;
- Postavljanje atletske tartan staze na stadionu „Hakija Mršo“.
- Izgradnja zaletišta i prostora za doskok za potrebe trenažnog procesa i takmičenja u skoku u dalj na stadionu „Hakija Mršo“.
- Postavljanje vještačke trave na pomoćnom stadionu
- Izgradnja otvorenog bazena iz Sportske dvorane „Amel Bečković“;
- Uspostava stalnog sistema nadzora i održavanja dječijih igrališta i vanskih sportskih ploha sa KJKP „Park“ Sarajevo.

### **2.2.1. Značaj sportskih objekata**

Značaj sportskih objekata sa aspekta sportskog odgoja djece i omladine je veoma bitan. Izgradnjom kvalitetnih i dostupnih sportskih sadržajima sklanjamo djecu sa ulice i odgajamo u sportskom duhu najbolji je način u borbi protiv droge, alkohola i drugih toksikomaniya. Sportski objekti trebaju biti funkcionalni i stalno dostupni djeci i omladini.

Na području Općine Vogošća registrovano je 29 sportskih klubova od kojih ima 20 različitih sportskih disciplina. Općina Vogošća je osnovala JU Kulturno-sportski centar Vogošća u čijoj su nadležnosti većina sportskih objekata. Kako bi ove

sportske objekte što više koristila djeca i omladina a koji su članovi nekih od sportskih klubova usvojeni su kriteriji kojim se reguliše korištenje sportskih objekata od strane sportskih klubova sa područja Općine Vogošća, i to tako da imaju besplatno korištenje za trenažni i takmičarski proces, kao i za rad sa djecom i omladinom.

## **2.2.2. Sportski objekti na području općine Vogošća**

Sportske objekte na području Općine Vogošća možemo podijeliti u nekoliko kategorija:

- Sportski objekti za predškolski uzrast,
- Sportski objekti za školsku djecu,
- Sportski objekti za omladinu i rekreativce.

### **2.2.2.1. Sportski objekti za predškolski uzrast**

Razna dječija igrališta možemo posmatrati kao sportske objekte. Lijepo uređena i rekvizitima dobro snabdjevena dječija igrališta imaju značajnu ulogu u savremenom predškolskom odgoju. Osim odgoja djeca na ovim igralištima razvijaju svoje funkcionalne i motoričke sposobnosti.

Za vrijeme agresije na BiH sva dječija igrališta na području Općine Vogošća su bila devastirana. Sa obnovom i opremanjem ovih igrališta krenulo se 2006.godine, a sa izgradnjom novih dječijih igrališta 2008.godine. Tokom 2016.godine ponovo je izvršena rekonstrukcija postojećih i napravljena četiri nova dječija igrališta. Trenutno imamo 19 dječijih igrališta koja su savremeno opremljena od kojih su četiri posve nova igrališta. Prilikom izgradnje ili opremanja dječijih igrališta posebno se misli na bezbjednosni aspekt kao i to da djeca imaju što raznovrsnije sadržaje. Samo tokom 2016. godine Općina Vogošća je uložila 100.000,00 KM za ove namjene, sa namjerom da se i dalje nastavi ulagati u ove objekte.

### **2.2.2.2. Sportski objekti za školsku djecu**

Imamo dvije vrste sportskih objekata za školsku djecu a to su:

- Sportski objekti u sastavu pet osnovnih i srednje škole
- Sportski objekti napravljeni na javnim površinama – otvorene sportske plohe.

Sportski objekti u sastavu osnovnih škola:

- Osnovna škola „Zajko Delić“ - Kobilja Glava, ima novoizgrađenu fiskulturnu salu, savremeno opremljena.
- Osnovna škola „Izet Šabić“ – Hotonj, ima fiskulturnu salu dobro opremljena

- Osnovna škola „Zahid Baručija“ – Vogošća, ima fiskulturnu salu koja nije uslovna, vanjski teren za mali nogomet, rukomet i košarku kao i vanjski teren za odbojku.
- Osnovna škola „Mirsad Prnjavorac“ – Vogošća, novoizgrađenu savremenu fiskulturnu salu koja je i dobro opremljena, vanjski teren za mali nogomet i rukomet kao i vanjski teren za košarku.
- Osnovna škola „Porodice ef. Ramić“- Semizovac, savremenu višenamjensku fiskulturnu salu nedavno izgrađenu, vanjski teren za mali nogomet i rukomet i vanjski teren za košarku.
- Područna škola u Gori ima vanjski teren za mali nogomet, rukomet i košarku.

Srednja mješovita škola u Vogošći ima fiskulturnu salu koja ispunjava sve uslove i dobro je opremljena.

### **2.2.2.3. Sportski objekti napravljeni na javnim površinama – otvorene sportke plohe.**

Ovo su objekti koje je Općina Vogošća pravila za korištenje djece i omladine a koja su dostupna stalno jer se nalaze na parkovskim površinama ili nekim drugim otvorenim plohama.

- Na MZ Svrake imamo betonsko igralište za mali nogomet i košarku.
- MZ Vogošća I ima dva betonska igrališta za mali nogomet i košarku,
- MZ Vogošća II ima betonsko igralište za košarku i mali nogomet,
- MZ Blagovac ima betonsko igralište za košarku,
- MZ Hotonj ima betonsko igralište za mali nogomet i košarku,
- MZ Kobilja Glava ima ansambl terena za nogomet i košarku na lokalitetu Bušća i malo betonsko igralište za mali nogomet i košarku.

Sva ova igrališta su opremljena neophodnim sportskim rekvizitima ( golovima i koševima) i redovno se održavaju.

### **2.2.3. Sportski objekti za klubove, omladinu i rekreativce**

U sportske objekte namjenjene klubovima, omladini i rekreativcima spadaju:

- Sportska dvorana „Amel Bečković“ – dobro opremljena u kojoj se mogu odvijati trenažni i takmičarski procesi za sve dvoranske sportove.
- Dva teniska terena – sa reflektorima koji se nalaze pored sportske dvorane.
- Stadion „Hakija Mršo“ u Vogošći sa glavnim i pomoćnim terenom – glavni teren u dosta dobrom stanju, betonske tribine bez stolica za oko 2.500 gledalaca.
- Stadion „Ešref Pustahija – EŠO“ u Semizovcu sa betonskim tribinama bez stolica za oko 1.500 gledalaca.
- Teren za mali nogomet pored Sportske dvorane „Amel Bečković“
- Dva novoizgrađena boćarska terena.
- Novoizgrađeni teren za odbojku na pijesku sa posebnim svlačionicama.
- Novoizgrađeni poluolimpijski zatvoreni bazen u sklopu WOG centra – privatno vlasništvo i nije u funkciji.
- Otvorena šahovska ploha.

- Sportski centar „Gabeljić“ Hotonj – otvoreni i zatvoreni tereni za tenis i mali nogomet (vještačka trava) – privatno vlasništvo.
- Sportski centar „SPORTA“ Hotonj – otvoreni i zatvoreni tereni za mali nogomet ( vještačka trava) i tenis – privatno vlasništvo.
- Teren za košarku kod OŠ «Mirsad Prnjavorac».

#### **2.2.4. Sportski objekti koji nedostaju na području Općine Vogošća**

Analizirajući stanje i potrebe vezano za sportske objekte na području Općine Vogošća konstatovano je da su prioriteta u narednom periodu sljedeći:

- Vještačka trava na pomoćnom igralištu Stadiona „Hakija Mršo“ u Vogošći – urađena projektna dokumentacija.
- Vanjski tereni u sklopu Osnovne škole „Zajko Delić“ na Kobiljoj Glavi – urađena projektna dokumentacija i dobijena građevinska dozvola.
- Vanjski tereni u sklopu Osnovne škole „Izet Šabić“ u Hotonju – urađena projektna dokumentacija i dobijena građevinska dozvola.
- Kod Sportske dvorane „Amel Bečković“ u Vogošći uraditi još jednu manju dvoranu za borilačke sportove, gimnastiku i trenažne procese klubova.
- U Osnovnoj školi „Zahid Baručija“ uraditi odgovarajuću fiskulturnu salu.
- Postavljanje standardizovanih stolica na betonskim tribinama u Vogošći i Semizovcu.
- Na stadionu u Vogošći izgradnja novih tribina ispod kojih bi bili poslovni prostori i svlačionice.
- Nastaviti sa izgradnjom novih dječijih igrališta kao i vanjskih otvorenih sportskih ploha.
- Izgradnja željezne zaštitne ograde i adaptacija sportskih prostorija stadiona «Ešref Pustahija Ešo».

Kako se vidi iz svega navedenog na području Općine Vogošća dosta je urađeno na izgradnji i rekonstrukciji sportskih objekata. Poslije rata bila je faza rekonstrukcije ali se u prethodnih desetak godina krenulo i u fazu izgradnje novih sportskih objekata. Potrebno je nastaviti ovom dinamikom kako se radilo do sada – određeni su prioriteta za naredni period, stvoreni su preduslovi (ima dosta pripremljenih projekata) koji će se nadamo se realizovati. Cilj je stvaranja što boljih uslova sa se djeca i omladina odgajaju u sportskom duhu i na sportskim terenima što je najbolji način za borbu protiv svih nedaća koje sa sobom nosi savremeno društvo.

### 2.3. Proklamovani javni interes u oblasti sporta

Općina Vogošća ima Odluku o načinu ostvarivanja javnog interesa Općine Vogošća u oblasti sporta («Sl.novine Kantona Sarajevo», broj: 24/02). Prema toj Odluci javni interes Općine Vogošća kada je sport u pitanju jeste razvojni sport, sa akcentom na masovnost. Općina Vogošća tom Odlukom preuzima obavezu finansiranja javnog interesa u oblasti sporta i u skladu sa tim je urađen Pravilnik o kriterijima za finansiranje javnog interesa općine Vogošća u oblasti sporta koji je , u ovom obliku, na snazi od 2007. godine.

U skladu sa ovim Pravilnikom budžetska sredstva dodjeljuju se isključivo na osnovu projekata i prijave po javnom pozivu koji objavljuje nadležna služba do 30. oktobra svake godine za narednu godinu.

Svaka organizacija/aplikant mora podnijeti projekat koji sadrži :

1. uvodne napomene,
2. opis projekta,
3. ciljeve projekta,
4. vrste planiranih aktivnosti i mjesto njihovog odvijanja,
5. metod rada i očekivane rezultate,
6. broj učesnika i njihovu starosnu dob,
7. troškovnik sa dinamikom trošenja sredstava.

Polazeći od odredbi Zakona o sportu, kao i opredjeljenja Općinskog vijeća Vogošća navedenih u Odluci o načinu ostvarivanja javnog interesa u općini Vogošća u oblasti sporta, sredstva planirana budžetom Općine, kao i Pravilnikom za finansiranje projekata iz oblasti sporta, dodjeljuju se u visini:

- I) 60% sredstava planiranih za finansiranje projekata koji se odnose na :
  - uplate kotizacija za takmičenja,
  - registracije igrača,
  - ljekarske preglede igrača,
  - licenciranje igrača
  - osiguranje igrača
  - uplate za službena lica,
  - prevoz na takmičenje,
  - nabavka sportske opreme,
  - za finansiranje specifičnih aktivnosti udruženja ( koji su karakteristični i nužne u odnosu na druga udruženja ) navedenih u projektima,
- II) 35% sredstava planiranih za finansiranje projekata koji se odnose na masovno uključivanje šire populacije Općine Vogošća u sportske aktivnosti na aktivnom i rekreativnom nivou, starosnu dob učesnika, trajanje projekta i mjesto realizacije aktivnosti.
- III) 5% sredstava planiranih za finansiranje projekata koji se odnose na školovanje stručnog kadra(u skladu sa članom 10. i 25. Zakona o sportu).

Bodovni kriteriji se utvrđuju na osnovu broja učesnika nekog projekta, njihove starosne dobi, trajanja projekta i mjesta odvijanja projekta.

Na ovaj javni poziv mogu aplicirati udruženja koja ispunjavaju sljedeće uvjete:

- da je nosilac projekta, odnosno podnosilac aplikacije organizovan u skladu sa pozitivnim zakonskim propisima,
- da ima sjedište na području općine Vogošća i da djeluje najmanje 1 godinu prije apliciranja po raspisanom javnom pozivu,
- da je zahtjev podnio Upravni odbor ili Predsjedništvo sportskog udruženja, organizacije ili asocijacije,
- da je stručni rad u sportskoj organizaciji usklađen sa zakonskim odredbama (u skladu sa članom 10. i 25. Zakona o sportu),
- da vodi matičnu evidenciju sportista i stručnog kadra na propisanim obrascima (u skladu sa Pravilnikom o sadržaju i načinu vođenja matičnih evidencija u sportu na području Kantona Sarajevo, Sl.novine Kantona Sarajevo br. 23/03)
- da ima obezbijeđene tehničke uvjete za realizaciju planiranih aktivnosti,
- dokazanu sposobnost za realiziranje aktivnosti iz oblasti sporta,
- da je ispoljena racionalnost u korištenju ranije dodijeljenih sredstava i da su budžetska sredstva uredno i na vrijeme pravdana.

Prispjele projekte razmatra Komisija za dodjelu sredstava udruženjima/ sportskim organizacijama po projektima koju formira Općinski načelnik sa nadležnom općinskom službom, te predlaže raspodjelu sredstava shodno bodovnim kriterijima , na osnovu kojih Načelnik donosi odluku o dodjeli budžetskih sredstava.

Korisnici budžetskih sredstava dužni su nadležnoj općinskoj Službi dostaviti finansijski i narativni izvještaj odmah po okončanju projekta koji traju do šest mjeseci.

Za projekte koji traju godinu dana, potrebno je dostaviti polugodišnji i godišnji izvještaj.

Ovakav način finansiranja javnog interesa u oblasti sporta pokazao se kao efikasan i pravičan. Sistemski uređeno finansiranje klubova dovelo je do sređivanja odnosa u klubovima i pojačane finansijske discipline i odgovornijeg odnosa prema budžetskim sredstvima.

Utrošak budžetskih sredstava kontroliše svake godine Komisija za kontrolu utroška budžetskih sredstava koju formira Općinski načelnik namjenski za kontrolu utroška kod sportskih klubova.

Klubovima koji ne mogu opravdati utrošak budžetskih sredstava uskraćuje se dalje finansiranje iz budžeta. Intencija je da raste udio sredstava namijenjenih mladima i da se najveći dio sredstava daje za projekte.

### 3. CILJEVI

U narednom petogodišnjem periodu ciljevi kada je oblast sporta na području općine Vogošća su sljedeći:

- U još većoj mjeri omasoviti sport u postojećim klubovima sa sjedištem u Vogošći.
- Povećati broj djece i omladine do barem 25% mladih uključenih u sport.
- Usmjeriti klubove ka dodatnim, izvanbudžetskim, izvorima finansiranja.
- S oprezom pristupati inicijativama formiranja novih sportskih udruženja kako bi se izbjeglo njihovo masovno formiranje samo radi korištenja budžetskih sredstava.
- Povećati stepen iskorištenosti postojeće sportske infrastrukture, sa posebnim naglaskom na veću iskorištenost kapaciteta u školama.
- Definirati načine korištenja kapaciteta JU KSC striktnom primjenom usvojenih kriterija.
- Zadržati saradnju klubova i RTV Vogošća na dostignutom nivou.
- Izgraditi nedostajuće sportske kapacitete.
- U saradnji sa klubovima, školama i JU KSC organizirati općinska takmičenja za škole u raznim sportskim disciplinama.
- Poboljšati saradnju između škola i klubova kako bi se, u saradnji sa stručnim institucijama, obavljala antropološka i antropometrijska mjerenja i vršilo rano otkrivanje i selekcioniranje djece.
- Izrada elaborata o opravdanosti i prednostima osnivanja Sportskog društva „Vogošća“.

Pored svih navedenih stavki vezanih za ciljeve sporta u Vogošći koja je izrađena od strane Službe za društvene djelatnosti veoma je bitno navesti još neke smjerove i tokove razvoja i unaprijeđenja sporta na području naše Općine.

- a) jasno definisanje minimuma obaveza svih sportskih udruženja
- b) redovna kontrola rada udruženja
- c) evidencija trenerskog kadra sa potvrdom matičnih saveza kao garanta tačnosti podataka upoređeno sa Zakonom o sportu
- d) raspodjela budžetskih sredstava sa paralelnom tabelom stavki po kojim kriterijima se vrši dodjela sredstava i objašnjenje dodijeljenih sredstava po stavkama određenim pravilnikom o dodjeli budžetskih sredstava sportskim udruženjima
- e) koordinacija službi sa osnovnim školama radi veće iskorištenosti sala
- f) izgradnja zajedničkog objekta za borilačke i druge pojedinačne sportove

## **4. PRAVCI RAZVOJA SPORTSKIH KLUBOVA**

U petogodišnjem periodu treba ohrabrivati klubove da unaprjeđuju i razvijaju svoju djelatnost kako bi što uspješnije ostvarivali javni interes općine Vogošća u oblasti sporta. Taj razvoj treba ići u nekoliko pravaca i to kao: omasovljenje sporta, veće učešće mladih, stručno osposobljavanje trenerskog kadra, oslanjanje na vlastite kadrove i uređivanje djelatnosti klubova sa zakonima i propisima.

### **Omasovljenje sporta**

Svi vogošćanski klubovi kao prioritetan zadatak treba da imaju omasovljenje svoje discipline i uključivanje što većeg broja aktivnih takmičara i rekreativaca u klub. To će se postići javnom prezentacijom te discipline, prenosima na televiziji, animiranjem navijača da prate takmičenja, te formiranjem različitih selekcija od pionira do veterana, te za muškarce i žene. Tamo gdje je moguće (Sportsko društvo invalida) formirati selekcije za takmičenje u raznim disciplinama.

### **Veće učešće mladih**

Veće učešće mladih je takođe zadatak koji proizilazi iz Odluke o javnom interesu općine Vogošća u oblasti sporta. Veći broj mladih u svoje redove sportska udruženja mogu privući propagiranjem sporta kojim se bave i kluba. Vrlo je značajna tijesna saradnja sa školama i nastavnicima tjelesnog odgoja, kako bi na vrijeme uočili sklonosti djece ka određenom sportu. Potrebno je organizirati takmičenja škola za najmlađi uzrast kakko bi se već u tom uzrastu privukli sportu. Predstavci klubova bi trebali organizirati antropometrijska mjerenja kako bi se prepoznali talentirani dječaci i djevojčice za određeni sport. Članarinu u klubovima treba zadržati na prihvatljivom nivou uz ugrađivanje mehanizama da djeca slabijeg imovnog stanja zbog toga ne budu isključena iz ovog procesa. U tom smislu treba ohrabrivati klubove da sve veću pažnju posvećuju svojim omladinskim pogonima i selekcijama.

### **Stručno osposobljavanje trenerskog kadra**

Treba insistirati da u sportskim udruženjima u trenažnom i takmičarskom procesu učestvuju kvalifikovane i stručno osposobljene osobe, sa posebnim osvrtom na njihovu osposobljenost za rad sa mladima. Strateški cilj je da za pet godina kroz školovanje novog i doškolovanje postojećeg kadra svako udruženje radi isključivo sa trenerima i stručnim licima osposobljenim u skladu sa važećim standardima.

### **Oslanjanje na vlastite snage**

Sportska udruženja treba ohrabrivati da se koncepcijski okrenu dugoročnim ciljevima i oslanjanju na vlastite snage. Time je dobit višestruka. Kao prvo pospješuje se motiv kod djece i omladine da se bave sportom jer su im realni izgledi da jednog dana u seniorskoj selekciji igraju značajnu ulogu u svom klubu. Oslanjanje na vlastite snage fokusira pažnju u trenažnom procesu, sportski razvoj članova omladinskih pogona je ozbiljniji i kvalitetniji i omogućuje transfere mladih sportista u veće klubove što obezbjeđuje dobrobit i njima i klubu u kojem su ponikli. Značajno oslanjanje na vlastite



snage u znatno većem broju privlači publiku. Oslanjanje na vlastite snage obezbjeđuje kontinuirane, a ne hibridne i , na duže staze, neodržive takmičarske rezultate.

### **Značajnije uključivanje osoba sa umanjenim sposobnostima u sportski život**

U cilju inkluzije u sve društvene tokove svih segmenata stanovništva posebnu pažnju treba pokloniti uključivanju osoba sa umanjenim sposobnostima u sportske aktivnosti. U tom smislu treba podržavati rad Sportskog društva invalida «Vogošća» i Udruženja za sport i rekreaciju invalidnih lica općine Vogošća. Pored toga i u drugim klubovima treba otvoriti prostor za uključivanje (u mjeri u kojoj je to moguće) osoba sa umanjenim sposobnostima.

### **Uređivanje djelatnosti klubova u skladu sa zakonima i propisima**

Oblast sporta polako, ali sigurno, dobija svoju zakonsku regulativu koja nastoji unijeti red u ovu oblast. Za mnoge sportske kolektive i udruženja ti novi standardi koje nameće zakon predstavljaju traumatično iskustvo, a nerijetko i neprelaznu prepreku. U tom smislu zadatak nadležne općinske službe bi bio da prati promjene u zakonskoj regulativi, da na vrijeme informiše udruženja o novim pravilima i obavezama, te da pruža stručnu pomoć udruženjima kako bi što jednostavnije i bezbolnije počeli primjenjivati novouspostavljene standarde.

Potrebno je naglasiti da se ovo u najvećoj mjeri i realizuje ta da nadležna služba i sportska udruženja tu ostvaruju dobru saradnju i da je primjena zakonskih rješenja i standarda u oblasti sporta u općini Vogošća na zavidnom nivou.

## **5. PLANIRANI PROJEKTI RAZVOJA NEDOSTAJUĆE SPORTSKE INFRASTRUKTURE**

I pored dosta dobro razvijene sportske infrastrukture u Vogošći i na ovom planu u narednih pet godina treba uraditi značajne projekte. Prije svega, neophodno je na pravi način koristiti, čuvati i održavati postojeću infrastrukturu. Kako onu u vlasništvu općine tako i onu koja je vlasništvo škola.

Pored postojeće treba pristupiti i izgradnji nove infrastrukture jer se Vogošća širi, povećava se broj stanovnika. Pored toga raste i broj sportskih udruženja kao i procenat učešća građana u tim udruženjima. U skladu sa tim prioritetni projekti u petogodišnjem periodu bili bi:

- Vještačka trava na pomoćnom igralištu Stadiona „Hakija Mršo“ u Vogošći – urađena projektna dokumentacija.
- Vanjski tereni u sklopu Osnovne škole „Zajko Delić“ na Kobiljoj Glavi – urađena projektna dokumentacija.
- Vanjski tereni u sklopu Osnovne škole „Izet Šabić“ u Hotonju – urađena projektna dokumentacija.
- Kod Sportske dvorane „Amel Bečković“ u Vogošći uraditi još jednu manju dvoranu za borilačke sportove, stoni tenis i trenažne procese klubova.
- U Osnovnoj školi „Zahid Baručija“ uraditi odgovarajuću fiskulturnu salu.
- Na stadionu u Vogošći izgradnja novih tribina ispod kojih bi bili poslovni prostori i svlačionice.
- Nastaviti sa izgradnjom novih dječijih igrališta kao i vanjskih otvorenih sportskih ploha.

## **6. SARADNJA IZMEĐU RAZLIČITIH INSTITUCIJA UKLJUČENIH U RAZVOJ SPORTA**

Razvoj sporta u Vogošći u velikoj mjeri ovisi o saradnji institucija koje se bave ovom djelatnošću a djeluju na području općine Vogošća. Te institucije su:

- Općina Vogošća
- JU KSC Vogošća
- Sportska udruženja
- Škole na području općine Vogošća
- RTV Vogošća
- Druge institucije koje se u svom radu dotiču sportske djelatnosti.

### **Općina Vogošća**

Općina Vogošća prati aktivnosti sportskih udruženja i brine za zakonitost rada. Koordinira rad različitih institucija u cilju što uspješnije realizacije ciljeva ove strategije. Općina Vogošća putem nadležne službe i odgovarajućih komisija vrši raspodjelu budžetskih sredstava na pojedinačne projekte sportskih udruženja i vrši kontrolu utroška tih sredstava.

Općina Vogošća, pored toga organizuje i provodi godišnji izbor najuspješnijih sportista, sportistkinja, trenera i sportskih radnika i najperspektivnijih sportista. Cilj tog izbora je da se dodatno potenciraju najuspješniji kolektivi i pojedinci, da im se iskaže priznanje, te da se ukaže na najperspektivnije talente. Potrebno je kontinuirano usavršavati kriterije za izbor kako bi se obezbijedilo da zaista najbolji dobiju ta priznanja čime bi jačala vjerodostojnost i ugled tog priznanja.

### **JU KSC Vogošća**

JU KSC Vogošća je institucija čija je osnovna djelatnost da razvija sport na području općine Vogošća. JU KSC Vogošća gazduje sportskim objektima i stavlja ih na raspolaganje sportskim udruženjima za trenažni i takmičarski proces, na osnovu unaprijed utvrđenih kriterija. Pored toga JU KSC Vogošća osmišljava i provodi projekte iz oblasti razvoja sporta.

### **Sportska udruženja**

Sportska udruženja učestvuju u takmičenjima, organizuju sistematsko i kontinuirano bavljenje članova i građana određenom sportskom disciplinom koristeći vlastite raspoložive kapacitete i/ili kapacitete drugih institucija uključenih u ovaj proces. Sportska udruženja osmišljavaju i provode projekte predlažući ih općini za sufinansiranje sredstvima budžeta.

### **Škole**

Škole su višestruko značajne za razvoj sporta. Sa jedne strane zato što su osnovni nosioci velikog broja projekata upravo školska populacija. Sa druge strane škole raspolazu sportskom infrastrukturom koju treba uključiti u razvoj sporta u vrijeme kada ti kapaciteti nisu iskorišteni u nastavnom procesu.

### **RTV Vogošća**

Postojanje lokalnog medija izuzetno je značajno za popularizaciju sporta i sportskih disciplina. RTV Vogošća, pored toga, obavještava javnost o aktivnostima klubova, prezentira njihove rezultate i u direktnim prijenosima i snimcima njihovih nastupa u takmičenjima informiše javnost.

### **Fakultet sporta i tjelesnog odgoja**

U namjeri da općina Vogošća Strategijom sporta postigne što kvalitetniji rezultat želi da ostvari saradnju sa Institutom sporta Fakulteta sporta i tjelesnog odgoja Univerziteta u Sarajevu. Saradnja bi se odvijala u dva smjera. Prvi je edukativnog karaktera u kojem bi se treneri i sportski radnici educirali putem seminara i radionica. Drugi pravac je testiranje, mjerenje i evaluacija sportskih klubova i njihovih članova kako bi se mogli pratiti transformacioni procesi.

## ZAKLJUČAK

Općina Vogošća shvatajući značaj sporta kao veoma kompleksnog i važnog aspekta razvoja lokalne zajednice, predloženom Strategijom 2017.-2022., želi da utječe na pozitivnu tranziciju sporta na njenom području posebno usmjerenu na mlađe naraštaje koji su fundament razvoja Općine Vogošća u budućnosti. Razvoj lokalne zajednice je fleksibilan, adaptibilan i konsultativan proces u kojem je potrebna sveobuhvatna saradnja svih relevantnih institucija sa područja općine Vogošća, osnovnih i srednju škola, sportskih klubova, roditelja, medija i sportskih resursa, u namjeri da se predloženom Strategijom postignu ciljevi: inkluzije što većeg broja djece u sport kroz participiranje u sportskim klubovima ili kroz školski sport, razvoj fundamentalnih sportskih vještina, razvoj „fair play“ odnosa na sportskim takmičenjima i van njih, etičkih principa, discipline, poštovanja i uvažavanja drugih, pozitivnog odnosa prema životu, i zadržavanje što većeg broja djece u sportu kao jednog od najboljih načina u borbi protiv svih negativnih posljedica modernog načina života.

Vogošća, maj 2017. godine